

**Senator Sabah keluar BN, sokong Pakatan  
Malaysian Insider  
12 Ogos, 2012  
Oleh Clara Chooi**

KOTA MARUDU, 12 Ogos — Pakatan Rakyat (PR) hari ini menerima seorang lagi pemimpin senior Barisan Nasional (BN) Sabah — Senator Datuk Maijol Mahap — sekaligus melihatkan pergolakan dalam parti pemerintah di negeri itu.

Mahap, naib presiden United Pasokmomogun Kadazandusun Murut Organization (UPKO) mengumumkan untuk keluar parti dalam satu majlis yang diadakan di rumahnya di Kampung Kokobuan, Kota Marudu, kira-kira 100km dari Kota Kinabalu tengah hari ini.

Majlis itu dihadiri oleh ketua umum PKR, Datuk Seri Anwar Ibrahim, setiausaha agung Datuk Saifuddin Nasution Ismail, ahli parlimen Kota Kinabalu dari DAP Hiew King Cheu, pengerusi DAP Sabah Jimmy Wong dan timbalan pengerusi Amanah Tan Sri Abdul Kadir Sheikh Fadzir.

Parlimen Kota Marudu kini dipegang oleh menteri persekutuan, Datuk Seri Dr Maximus Johnity Ongkili yang juga timbalan presiden Parti Bersatu Sabah (PBS), rakan UPKO di BN Sabah.

Dalam ucapannya, Maijol berkata perubahan akan berlaku di Sabah dan seterusnya di Malaysia.

Keputusan pilihan raya 2008 BN hilang dua pertiga majoriti dan terus berkuasa kerana diselamatkan oleh kerusi parlimen di Malaysia Timur iaitu di Sabah dan Sarawak.

"Bagi saya, semua ini berlaku dan akan terus berlanjutan kerana satu faktor dan faktornya adalah Datuk Seri Anwar Ibrahim.

"Dia telah mencipta satu semangat untuk berubah di Malaysia dan ini akan mencetuskan sistem dua parti dan saya menyokong perkara ini," katanya lagi.

Maijol menambah, walaupun keputusannya meninggalkan BN, tetapi dia tetapi menghormati presiden UPKO Tan Sri Bernard Dompok dan "budaya korporat" dalam parti.

Beliau berkata akan meletak semua jawatan kerajaan, termasuk kedudukannya selaku pengerusi Saham Sabah Berhad, dan meneruskan perjuangan politiknya melalui APS.

Bercakap dalam sidang media, Maijol berkata beliau akan terus mengekalkan jawatannya sebagai senator, setelah dinasihatkan Anwar dan pemimpin PR.

Dia mahu memainkan isu rakyat Sabah apabila Dewan Negara bersidang pada 3 hingga 8 Disember, kali ini selaku ketua pembangkang. Tempoh tamat Maijol berakhir pada Disember.

Mempertahankan keputusan Maijol, Anwar berkata Maijol harus kekal menjadi senator untuk membuktikan sebabnya meninggalkan BN, iaitu kerajaan tidak bersungguh-sungguh mendengar masalah rakyat di Sabah.

"Saya nasihatkan dia, tapi terpulanglah kepada dia, dia boleh terangkan dan bersuara di Dewan Negara untuk Sabah. Jangan fikir dia lakukan begini sebab dia terdesak untuk kekalkan jawatannya," katanya lagi.

Maijol juga menjangkakan lebih ramai lagi yang akan melompat setelah pada bulan lalu ahli parlimen Tuaran Datuk Seri Wilfred Bumburing dan ahli parlimen Beaufort Datuk Seri Lajim Ukin keluar dari parti masing-masing untuk menyokong PR.

Kedua mereka berada di rumah Maijol hari ini, keluar parti kerana tidak berpuas hati dengan kelewatan penubuhan Suruhanjaya Diraja (RCI) mengenai masalah pendatang tanpa izin di Sabah.

Hanya selepas beberapa hari mereka meninggalkan parti, perdana menteri Datuk Seri Najib Razak mengumumkan RCI yang diputuskan kabinet pada 8 Februari yang lalu.

Perdana menteri juga memberitahu lapan perkara dalam penubuhan RCI di Kota Kinabalu semalam, selepas bertemu dengan pemimpin BN negeri.

Hakcipta © 2012 The Malaysian Insider

Source:

<http://www.themalaysianinsider.com/bahasa/article/senator-sabah-keluar-bn-sokong-pakatan/>